

**ՔԱՎՈՐԸ ՊՈՆՏՈՍԻ ԵՎ ՀԱՅԱՍՏԱՆԻ ՀՈՒՅՆԵՐԻ
ՀԱՐՍԱՆԵԿԱՆ ԱՐԱՐՈՂԱԿԱՐԳՈՒՄ (XIX – XX դդ.)**

Ինչպես հայերի, այնպես էլ Պոնտոսի հույների ընտանեկան կյանքում քավորը մեծ տեղ է զբաղեցնում: Նրա մշտական ներկայությունը տվյալ ընտանիքի կյանքում սկսվում է սերնդագործության հիմք հանդիսացող ամուսնության և հարսանեկան ու մանկածնության ծիսական համալիրներին ակտիվ մասնակցությամբ ստանձնած որոշակի պարտականությունների իրականացմամբ:

Քանի որ և հայկական, և հունական հարսանիքներում քավորը ողջ այդ հարսանեկան ծիսաշարի ընթացքում գտնվում է գործունեության լայն դաշտում և բազում գործառույթներով է հանդես գալիս, ապա դրանք մեկ հաղորդման սահմաններում ներկայացնելու և համեմատական համալիր վերլուծություն կատարելու հնարավորություն մեզ չի ընձեռվում: Ուստի, սույն հաղորդման մեջ համեստ փորձ է արվում ուշադրություն հրավիրելու հունական հարսանիքում առկա քավորի գործառույթներից երկուսի տոհմական քավոր հասկացության և քավորի պատասխան երևույթի վրա, պարզաբանել, թե որքան է ժամանակը և այլ էթնիկ միջավայրն ազդել դրանց պահպանման կամ այլակերպման վրա: Այդ նպատակով օգտագործել ենք ինչպես մասնագիտական գրականության տվյալները, այնպես էլ Հայաստանում բնակվող և Հունաստանում (Ալեքսանդրուպոլիս, Դիդիմոտիխո, Օրեստիադա, Թեսալոնիկի և այլն) վերահաստատված պոնտական հույների միջավայրում մեր կողմից գրառված դաշտային ազգագրական նյութերը:

Քավոր և քավորակին բառերն ինչպես հույների հետ խառը բնակվող հայաշատ վայրերում¹, այնպես էլ հույների մեջ ունեն մի քանի համարժեքներ *կումբարոս* - *կոմբարցա* (κοιμήραρος - κοιμήρατος), *դեքսամենոս* - *դեքսամենցա*² (δεξιμενος - δεξιμεντος), *նունոս* - *նունա*³ (νοῖνος - νοῖνα) և *օփսիկ*⁴ (οψικ), որոնցից յուրաքանչյուրը գործածվում է կոնկրետ գործողության ժամանակ: Այս երեք բառերից ամենատարածվածը *կումբարոսն* է: *Օփսիկ* անվանու-

¹ Պոնտոսի հայերը քավորին ասում են զրնկապրիս, տրապիզոնցիները զրնկահար, քավորկնոջը զրնկահին, Գամիրքի հայերը ընթապապ - И. В. Кузнецов, Одежда армян Понты, Москва, 1995, стр. 115, 4, Ս. Թեմուրճյան, Գամիրքի հայերը, Եր., 1970, էջ 119:

² Αρχείο του Ποντιακού και Μεταπολεμικού Πολιτισμού, Ισάκκυνα, 2001, էջ 64:

³ Γεωργιάδης Θεόδωρος, Ο Πόντος, τόμος 2, Θεσσαλονίκη, 1994, էջ 562:

⁴ Αρχείο Ποντού, τόμος 384 Αθήνα, 1984, էջ 211:

մը քավորին տրվում է հարսի հոր տուն առաջնորդող հարսնադի խմբի պորիայի, կողմից: Այս բառը բարբառային է և ունի երկու բացատրություն: Առաջին դեպքում *օլու*-ն նշանակում է դանդաղ: Այսինքն քավորի կողմից դեկավարվող հարսանեկան չբախումբը խրախճանալով հանդարտ մոտենում է իրենց պատվին բացված առատ ուտեստներով սեղաններին. արարողություն, որն ուղեկցվում էր ճոխ և պարտադիր հյուրասիրությամբ, բարեմադթանքներով, երգով ու նվագով, աղմուկ աղաղակով: Հարսնադի խմբի ճիշտ այսպիսի ընթացքի հանդիպում ենք նաև հայկական ավանդական հարսանիքի վերաբերյալ ազգագրական գրականության մեջ⁵: Օփսիկի երկրորդ իմաստը բառացի նշանակում է տեսնել: Այս պարագայում, տեսնելը պետք է հասկանալ քավորի հսկողական դերակատարումը հարսանեկան ողջ արարողակարգի ընթացքում: Դա նշանակում է, որ քավորը հսկում ու պաշտպանում էր փեսացուին կարծեցյալ թշնամիներից, չարակամորեն տրամադրված մարդկանցից: Այս իմաստի մեջ է մտնում նաև հարսանեկան արարողությունից հետո առագաստի գիշերը փեսացուի քավորի տանը գտնվելը և նրա հետ ընելը: Այս գործողությունը միտված էր փեսացուի անվտանգությունն ապահովելուն (սեռական ընդունակությունները կապ գցելուց զերծ պահելուն) և քավորի խրատական փորձառությունը հաղորդելուն^{6 7}: Ինչ վերաբերում է հարսնացուին, ապա նա փեսացուի տանն այդ օրը համարվում էր «հյուրընկալված» (*Ֆիլոքսենումենի*) և մինչ առագաստը գիշերում էր հարսնաքրոջ կամ քավորակնոջ, կամ էլ փեսայի քրոջ տալի, որևէ այլ մերձավոր ազգականուհու հետ: Այդ միջոցին փորձառու կինը նորահարսին նախապատրաստում էր առագաստին, նաև հետառագաստին փեսայի մերձավորների նկատմամբ ամոթխած պահվածք դրսևորելուն:

Ուշագրավ է ևս մեկ սովորույթ, որը բնորոշ է Պոնտոսի հույների հարսանեկան ծիսական համալիրին: Հարսանեկան խրախճանքի ավարտից հետո, երբ նորապսակները պատրաստվում էին իրենց հատկացված առագաստի հարկաբաժին գնալ, քավորը քաղցրավենիքի և դյուրամարս ուտեստի (տոլմա) պարունակությամբ մատուցարանով ներս էր մտնում և հյուրասիրում նրանց⁸: Հայաստանի հունաբնակ գյուղերում կատարած մեր ուսումնասիրությունների ժամանակ նման սովորույթի առկայություն չարձանագրվեց: Այսօր, ուշագրավն այն է,

⁵ Ռ. Նահապետյան, Հայոց սոցիոնորմատիվ մշակույթը, մաս 1, Երևան, 2009, էջ 117. Արշակ Ալպոյաճյան, Պատմութիւն Եւդոկիոյ Հայոց, Կահիրե, 1952, էջ 1508:

⁶ AN - Καμπούριδου, Το εθιμα του γάμου στην Νιουπολη του Πόντου, Αθήνα, 1983, էջ 225:

⁷ Գանձակում և Թուրքիայի որոշ գավառներում հարսանիքի առաջին գիշերը փեսայի քավորի հետ ընելու մասին է վկայում նաև Գ. Իփեկյանը: - Ազգագրական հանդես, 24-րդ գիրք, Թիֆլիս, 1913, էջ 103

⁸ Έθνηματα Κ. Αιγίου, Απο τη ζωή του Πόντου, Αθήνα, 1939, էջ 215:

որ ապրելով հայկական միջավայրում, հունական ընտանիքներում չեն պահպանվում առազաստից հետո «կարմիր խնձոր» ուղարկելու և դրանում քավորի կնոջ ակտիվ դերակատարում ունենալու սովորույթը, ինչպես որ բնորոշ է հայոց ավանդությանին համալիրին:

Այժմ հակիրճ անդրադառնանք վերոնշյալ երկու երևույթների մեկնաբանմանը: Դրանցից մեկը տոհմական քավորի դերակատարման հարցն է: Քավորը պոնտական հույների նորաստեղծ ընտանիքներում հարգանք ու մեծ հեղինակություն էր վայելում, այն սրբություն էր: Անգամ երկու, ոչ ազգակից, տարբեր ընտանիքների մկրտության նույն քավորի ընտրության պարագայում, այդ ընտանիքները խնամհանալու իրավունք չունեին, դա դիտվում էր որպես սրբապղծություն, քանզի նրանք այդուհետ համարվում էին հոգևոր ազգակցությամբ կապված ընտանիքներ: Հոգևոր ազգակցական կապերով կապված ընտանիքներ էին համարվում նաև մկրտության նույն օրը, նույն ավագանում մկրտվածները, որոնք այդուհետ համարվում էին հոգևոր քույրեր ու եղբայրներ: Դրա համար էլ սովորույթի համաձայն հունական միջավայրին բնորոշ էր նաև աղջիկ երեխաներին կանանցից քավոր ընտրելը, իսկ տղա երեխաներին տղամարդկանցից ընտրելը⁹:

Պոնտոսի, ՍՊՀ-ի և Հայաստանում ապրող հույների քավորը տոհմական է եղել, քավորությունը փոխանցվել է սերնդեսերունդ, այն փոխելը գրեթե բացառվել է: Հունական հարսանիքում քավոր դառնում էր նա, ով փեսացուի կնքահայրն էր, ուստի մինչև սանիկի ամուսնանալը, քավորի մահացած կամ պանդխտության մեջ լինելու պարագայում նրան կարող էր փոխարինել որդիներից մեկը ըստ ավագության կարգի¹⁰, երևույթ, որ նույնությամբ հանդիպում ենք նաև հայկական ավանդական ծիսական համալիրում¹¹: Կնքահորը կարող էր փոխարինել միայն նրա արու զավակների տեր ազգականը: Քավորի դեռևս չամուսնացած որդով փոխարինելու պարագայում քավորակնոջ պարտականություններն ընկնում էր մոր և քրոջ վրա, վերջինս մշտապես ուղեկցելու էր նորահարսին, պարագնելու էր քավորի նվերներով լեցուն «սինի»¹² - սկուտեղը, երևույթ, որն ուշ շրջանի երևույթներից է:

⁹ Έλεν0, Π. Ἀλεξάνδρ. Τα γέννη καὶ ἡ οἰκογένεια στὴν παραδοσιακὴ κοινωνία τῆς Μάνης, Α 0ίον, 1980, էջ 43:

¹⁰ Γεωργιάδης Θεόδωρος, նշվ աշխ., էջ 562:

¹¹ Ռ. Նահապետյան, Աղծնիքահայերի ամուսնահարսանեկան սովորույթներն ու ծեսերը, Երևան, 2007, էջ 140:

¹² Տես Մ. Սպրետյան, Դաշտային ազգագրական նյութեր (այսուհետ՝ ՂԱՆ), 2009, Հուն. հանր., Ալեքսանդրուպոլիս, տ. 2, էջ 5 - 7, Ξενοφώντα Κ. Ακαχλον, նշվ. աշխ., էջ 52:

Ըստ մեր գրառած դաշտային ազգագրական նյութերի, տվյալ սովորույթը բնորոշ է նաև Հայաստանի հույներին: XXդ. 90-ական թվականների հայաստանաբնակ հույների Հայաստանից դեպի Հունաստան զանգվածային արտագաղթից հետո որոշ ավանդույթներ, այդ թվում նաև տոհմական քավորի պահպանման երևույթը խիստ փոփոխության է ենթարկվել: Այս առթիվ տրված հարցին ի պատասխան Լոռու մարզի Ստեփանավանի տարածաշրջանի Յաղդան գյուղի մախսին բնակիչ, բայց այսօր Հունաստանի Ալեքսանդրուպոլիս քաղաքում ապրող Նիկոլայիդիս Յանկան (ծնված 1939թ.) հաղորդեց, որ ինքն ու իր եղբայրները Հայաստանում ապրած տարիներին ունեցել են իրենց տոհմական քավորը, բայց երբ եկան Հունաստան և իր տղային ամուսնացրին, որդին իրենց տոհմական քավորին փոխարինեց իր հունաստանցի հույն ընկերոջով¹³: Նույն երևույթի մասին է խոսում նաև Հանքավանի հույն, բայց Երևանում բնակվող Չախիրովա Ռոզան (ծնված 1937թ.), որի տղան ևս Հունաստանում հայուհու հետ ամուսնանալով իր կամքով փոխել է ընտանեկան քավորին¹⁴:

Ինչ վերաբերում է երկրորդ երևույթին՝ նյութական արժեքների տեսքով «քավորի պատասխան» տալուն, որ բնորոշ է եղել հայկական ավանդույթային հետհարսանեկան արարողակարգին, ապա հունական ավանդույթի համաձայն այն այլ ընթացք ունի: Համաձայն հունալեզու մասնագիտական գրականության փեսացուի սափրման արարողության պահից, որին պարտադիր մասնակցություն ունի քավորը, մինչև բուն հարսանեկան ծեսի ընթացքում փեսային տրված դրամական տեսքով նվերները հանձնվում ու պահվում էին քավորի մոտ: Հարսանիքի ավարտից մեկ շաբաթ կամ ամենաշատը տաս օր անց քավորն իր տանը խնջույքի ճոխ պատրաստություն էր տեսնում և նորապսակներին հրավիրում իր տուն (τα παδοστριον), որի ժամանակ էլ նրանց էր հանձնվում հավաքված և իր մոտ պահված ողջ գումարը¹⁵: Երևույթ, որ չի արձանագրվում հայաստանաբնակ հույների շրջանում ըստ երևույթին հայկական ավանդույթի ազդեցությամբ պայմանավորված: Այստեղի հունական միջավայրին բնորոշ է հարսանիքից հետո, որպես քավորի պատասխան, մի որոշակի պայմանավորված օր, նորապսակ զույգերի քավորի տուն գնալը և նրան իրենց շնորհակալությունը նվերի տեսքով հայտնելը¹⁶: Վերոհիշյալ երկու երևույթներն էլ Հունաստան վերաբնակված հույների շրջանում ներկայումս չեն պահպանվում:

¹³ ՂԱՆ, տ. 1 (2009, Հուն. հանր., Սալոնիկ), էջ 3-5:

¹⁴ ՂԱՆ, տեսաերիզ 2 (ՀՀ, Երևան):

¹⁵ N. Αγγερόπου, Το Νυμφίοτρυον, Αθήνα, 1983, էջ 210:

¹⁶ ՂԱՆ, տեսաերիզներ 3, 4, 5 (Հանքավան, Յաղդան, Ալավերդի, 2009 - 2010):

Ղաշտային ազգագրական մեր գրառած նյութերի համաձայն ամենուրեք
իլունական ընտանիքի քավորը ավանդական և ժամանակակից հարսանիքում
հանդիսացել է ողջ հարսանեկան համալիրի ղեկավարը, կարևոր դերակատա-
րում է ունեցել և այժմ էլ մասնակի կերպով ունի նախահարսանեկան, բուն
հարսանեկան և ետհարսանեկան արարողակարգում: Հարսանեկան ծիսակա-
տարությունների ամբողջ ընթացքում քավորին վերապահված էր բացառիկ դեր
նորապսակներին նախապատրաստել ամուսնական կյանքին հանուն արգա-
սավոր սերնդածի: Ավանդույթի համաձայն քավորությունը ժառանգական էր,
նա եղել է ազդեցիկ անձ, որը վճռորոշ դեր է խաղացել նորապսակների
նորաստեղծ ընտանիքում առողջ մթնոլորտ ստեղծելու, ամուր և ջերմ հարա-
բերություններ հաստատելու գործում: Ինչ խոսք, ժամանակի ընթացքում, տար-
բեր էթնիկ միջավայրերում ամուսնաընտանեկան ծիսական արարողակար-
գերում քավորի զբաղեցրած դերն ու գործառույթները ենթարկվել են լական
փոփոխությունների կապված մի դեպքում էթնիկ տարբեր միջավայրերի
առկայության և մյուս կողմից տարբեր սոցիալ- տնտեսական, քաղաքական և
էթնոմշակութային տիրող համակարգերի: